

Gvangjsih Minzcuz Bau

ganhhau: CN45-0036 B.2020 Nd.4 Ng.29 liggaueq gengcej nienz ndwenseiq cocaet

广西民族报

(壮文版)

主管主办: 广西壮族自治区

区民族宗教事务委员会

编辑出版: 广西民族报社

出版期数: 总第 3421 期

Gvangjsih Minzcuz Yijvwnz Yenzgiu Cungsim Son Vunz Diucaz Soucomz Sawloih Vahcuengh

Ndwen 4 ngoenz 12 daengz ngoenz 21, Gvangjsih Minzcuz Yijvwnz Yenzgiu Cungsim bae Laizbinh Si Hinghbinh Gih son mizgven vunz guh hong diucaz soucomz sawloih Vahcuengh.

Vih baujmaenh bineix hong gak hangh yezvu ndaej ciuq mbaek gonqlaeng guh, aen cungsim neix aeu hong diucaz soucomz sawloih Vahcuengh bineix guh haenx yungh gij hingzsiq goqdaez yenzgiu hawj mizgven vunz fucwz, baij vunz yezvu

bae mizgven aen yienh(gih) dangciengz son fuengfap diucaz sawloih, cingileix yaemhaeh daengj cihsiz, caemhcaiq diucaz sawloih yaemhaeh Vahcuengh, bang mizgven vunz cingileix ok yaemhaeh Vahcuengh dangdieg, guh'ok aenbiuj diucaz sawloih doengz yaem Vahcuengh, vih yamqlaeng guh ciengzsaeg diucaz roengz giek ndei.

Hong diucaz soucomz sawloih Vahcuengh vih coglaeng bienraiz ceksaw hongdawz Sawcuengh Vah-

cuengh ndaej miz gij caizliuh vahgangj lai, vih yaemvah Vahcuengh, sawloih gveihfan daezhawj gaengawq. Daengz bi 2019, gaeng diucaz soucomz sawloih Vahcuengh Vujmingz, Duh'anh, Liujgyangh daengj 17 dieg. Aen Cungsim neix lij yaek baij vunz bae Bahmaj Yauzcuz Swciyen caeuq Yungzsuij Myauzcuz Swciyen son vunz diucaz soucomz sawloih Vahcuengh dangdieg.

(Vangz Beihingh Ouh Caij-fangh)

Yungzsuij: Vangjloz Cigboq Coux Ciet "Haj It"



4 nyied 25 hauh, Yungzsuij Myauzcuz Swciyen youq Lauj-ginhdung Ginggih gawjbanh vwnzva liyouz daejniemh vangjloz cigboq hozdung, dangciengz boq guhcaz, dingq Fwenmyauz, gwn ngaiz ndoengj, boq aenvenz diuq foux Myauzcuz daengj, cienzmienh langhbaj liyouz swhyenz miz daegsaek, ciepcoux cietguhong "haj it". Ndaw doz dwg song dahsau Myauzcuz daek caz hawj gyoengq hek.

(Lungz Linzci/龙林智)

Swhyenz Yen Baengh Vwnzva Minzcuz Vunznoix Hwngfat Lijyouz

Geij bi neix daeu, Swhyenz Yen gaemdawz minzcuz fungcingz naekgywd, vwnzva giekdaej naekna miz daegsaek, gaenxmaenx damqra ok diuz roen cauhamoq ndeu, yungh ciet go daengdah, gij vwnzva minzcuz vunznoix daengj guh caidij coicaenh daengx yienh minzcuz fungcingz liyouz hwngfat.

Lai doigvangq "daengdah dahmbwn" yienjok. Youq liggaueq "ndwenceit cibngux" banh ciet go swncienz hwngfat aen minzsuz vwnzva conzdungj neix, caemhcaiq aeu "cuengq daengdah" hozdung ndeindei dox giethab hwnjdaeu, yinx ndaej haujlai bouxhek ndaw guek rog guek daeu, guh ndei

minzcuz fungcingz liyouz binjbaiz, bangdoi gizdieg ginghci onjyamq hwngfat.

Swncienz "fungsug minzcuz" daegsaek binjbaiz. Aen yienh neix youzcuz Vujbaiz caeuq Nizneine Myauzcuz ndaej liedhaeu Gvangjsih feihvuzciz vwnzva yizcanj mingzloeg, laebbaenz aen nduj dieggoek swncienz gijsiuq Mbanjyauz, caemhcaiq cauhaeb le Aen Gunghshw Mizhanh Swncienz Gijsiuq Mbanjyauz Swhyenz Yen. Yungh gij binjbaiz youzcuz Vujbaiz caeuq Nizneine Myauzcuz, caeuq dangdieg makyungz, makdauz, makit, nohvaiz daengj doxgaiq dox giethab hwnjdaeu, hawj bouxhek ndaej daejniemh "yawjngonz, cimz

gwn".

Dajcauh "saekhoengz liyouz" cingbinj lohsienq. Cungfaen fatok Liengzsuij Myauzcuz Yangh Dangzung Cunh, Hozgouj Yauzcuz Yangh Cunghbingz Cunh daengj dieggoek gwzming laujgih cozyung, haengrengz cauhamoq "saekhoengz liyouz + " hwngfat vunqsik. Yungh Gvangjdungh Gvangjsih doxgap banggunz guh seizgei, bued cienz 950 fanh maenz dajcauh aen hanghmoeg banggunz haifat liyouz Dangzung Cunh(dwg aen mbanjungzhoh), vih gwzming laujgih ginghci ndawbiengz hwngfat ok rengz hoengh.

(Huz Fanghfangh)

SIUSIK DINJ

● Ndwen 4 ngoenz 22, ciuq iugouz doxfaen haihag, Denzdungh Yen 3.3 fanh lai boux hagseng gau it, gau ngeih nienzgaep, co it, co ngeih nienzgaep, siujyoz sei, haj, roek nienzgaep swnhleih dauq hagdangz, gak hagdangz hong dauq hwnjdangz miz bouhloh guh.

(Cauh Meijgenh)

● Geij bi neix daeu, Lungzswng Gak Cuz Swciyen netsaed doicaenh mbawcaz banggunz canjnieb, doenggvaq gij canjnieb hwngfat vunqsik "gunghshw+hozcozse+dieggoek+nungzhoh", daiq vunz lai gyalai souhaeu ndaej fouqmiz. Daengz seizneix, daengx yienh cib aen yanghcin ndaem miz mbawcaz, ndaem mbawcaz najdieg miz 1.7 fanh lai moux, baenz gij canjnieb vunz lai gak vunz vut gunz ndaej fouqmiz.

(Banh Cisiengz)

● Bineix doxdaeu Denhdwngj Yen yungh lai cungj banhfap, gaenxmaenx son vunz bonj dieg daegbied dwg goengrengz gungzhoh cienjsen couhnieb, saedyienh gyaranz laisou coi vut gunz. Daengz seizneix, aen yienh neix gungh haifat ok aen gangvei goeng'ik anbaiz 716 bouxguhong, ndawde boux gig gungzhoh 79 boux.

(Luz Linzhui)

● Mboengqneix, Lungzcouh Yenveij Cwngfazvej cujciz aen dangcibhu dangjenz bae aen mbanj bangfuz Cuzbu Yangh Sanhcah Cunh Mbanjgyauyauh guh gagnyienh fugsaeh hozdung, fat ceksaw iq guekgya ancienz cihsiz, mbawveh senhconz dwkcawz bangvunz simnduk, mbawsaw yuqnaeuz fanj sezgyau daengj swhliu hawj vunz lai.

(Couz Yungj)

● Bineix doxdaeu, Denhdwngj Yen okdaiz mizgven siuhfei banggunz cwngcwz, cauhaeb "gwnz muengx + yienhciegz" gai vunqsik, mboujdan bang vunz lai gajgez gai doxgaiq hoj, lij hai aen hawciengz hawj Denhdwngj gai doxgaiq miz daegsaek, doi-doengh doxgaiq miz daegsaek Denhdwngj "byaij okbae", hawj doxgaiq lai okmingz, bangrengz vut gunz baenz miz.

(Vangz Saugi)